

Bourges, 6. Juni 1555

Von Franciscus Duarenus

Abschrift: UB Leiden, BPL 191 BU, fol. 19v-20r.

Wolfio S. D.

Quod de mea salute, otio, dignitate ita solicitus es, mi Wolfi, ego verò eo nomine quam tibi sim obstrictus, nulla oratione satis exprimere possum. Ac tametsi pergratum mihi sit quod scribis περὶ τῶν μεγιστάνων ὑμετέρων, tamen longè pluris facio vel tuam vel aliorum similiūm, id est bonorum et eruditorum hominum consuetudinem, qua in istis locis vix carere mihi posse videor. Ne viuam, mi Hieronyme, si aliter loquor ac sentio. Quare non est quòd verear, ne splendore illo captus, in quo iam diu vixi, Barbariem, vt ais, ferre nequeam. Sic enim tibi nobiscum iocari libuit, vt quidem ego interpretor, qui nulla in parte humanitatis Germanos cedere nostratibus semper existimaui, quęcumque sit diversa vulgi opinio. Quin barbarum iure optimo eum appellauerim, quem non pudeat eos in barbaris numerare, apud quos literę, pietas, omnis denique virtus tanto in pretio atque honore habeatur. Nec verò cum Scythis ipsam vitam degere recusem, si tales esse eos mihi persuaserim: tantum abest vt à Germania atque adeò Borussia sim alienus, si ita tulerit occasio vt solum mihi vertendum sit. Et is est Borussorum istorum regulus, (quod quum ex multorum sermone, tum ex literis tuis conijcere licet) vt homo studiosus bonarum artium imperio eius delectari debeat. Δευτέρας φροντίδες in Demosthenem tuas accepi: munus vt per se mihi iucundissimum sit, multò charius ac pretiosius, quòd à te profectum sit. Nam et talia virorum talium munera, iudicij vim ac pondus habent, et accipientibus multum decoris ornamentique afferunt. Sed quia nihil habeo in pr̄esentia quod tibi vicissim reponam, homo tot nominibus tibi deuinctus, vt pudore nonnullo afficiar, peto à te humanissime Wolfi atque oro, vt dum mihi par voluntati facultas oblata fuerit, studium in te meum interim boni consulas. Vale. Auarici Biturig[orum] die 6. Iunij 1555.